

Ubat tradisional perlu kajian saintifik

UM-30/7/2006

KUALA LUMPUR 28 Julai – Para pengamal perubatan herba tempatan perlu melakukan kajian saintifik terhadap produk mereka supaya keberkesanannya terbukti dan menepati piawaian yang ditetapkan.

Isteri bekas Perdana Menteri, Tun Dr. Siti Hasmah Mohd. Ali berkata, kajian saintifik itu perlu bagi mengelakkan produk yang dipasarkan itu dipersoalkan oleh pengguna.

“Ubatan tradisional kini telah dianggap sebagai salah satu perubatan alternatif di samping perubatan moden. Oleh itu, jika kajian saintifik tidak dilakukan dan tidak menepati piawaian, maka masyarakat akan meragui dan tidak mempercayai kehebatan herba kita sendiri,” katanya ketika berucap pada majlis minum petang *Gala Tea* yang merupakan salah satu acara sempena Persidangan Kesihatan Wanita dan Perubatan Tradisional Asia (WHAT) 2006, di sini hari ini.

Beliau juga berkata, ubatan tradisional kini kembali menduduki tempat memandangkan kos perubatan moden hari ini untuk

merawat penyakit-penyakit kronik begitu mahal dan menyusahkan.

“Penyelidikan herba tempatan ini patut dipuji dan sepatutnya mendapat sokongan padu dari semua pihak. Ia tidak memerlukan kos yang tinggi malah ubatan tradisional ini akan membuktikan kepada mereka yang meragui herba tempatan berdasarkan bukti positif yang ada,” ujarnya lagi.

Pada masa yang sama, Dr. Siti Hasmah mengingatkan orang ramai supaya mengambil tahu tentang implikasi yang akan menimpa jika mereka membeli dan menggunakan ubatan tradisional yang tidak mendapat kelulusan pihak berkuasa seperti yang dijual di pasar malam dan kaki lima.

“Jika Botox telah diharamkan dan diragui kandungannya, maka ubatan tradisional kita juga akan mengalami masalah yang sama jika kita tidak berjaga-jaga,” tambahnya.

Turut hadir pada majlis tersebut ialah Ketua Pengarah Institut Penyelidikan Hutan Malaysia



DR. Siti Hasmah Mohd. Ali melihat bunga senduduk putih pada Persidangan Kesihatan Wanita dan Perubatan Tradisional Asia 2006 di Kuala Lumpur, semalam.

(FRIM), Datuk Dr. Abdul Razak Mohd Ali dan Naib Canselor Universiti Sains Malaysia (USM), Profesor Datuk Dzulkifli Abdul Razak.

Majlis minum petang itu juga telah dimeriahkan dengan upacara memotong kek sempena sambutan ulang tahun kelahiran Dr. Siti Hasmah yang ke-80.